

武寧縣志卷之四十四

武寧縣知縣滇南李

珣纂

雜記

山川曠盈今古遼博孰竟其藏孰啓其鑰石室蘭臺紛焉研索耳治目收鴻纖互託意在勸懲亦莊亦譏夷堅諾臯徵煩取約是日說家義類炳灼敝帚適用雞肋堪嚼瑣碎紛龐治而不削廣彼前聞毋傷穿鑿作雜記

伊叟秦時人避地武寧山中嘗於石湫拾一卵大可數升五色晶瑩異而伏焉歲餘產一龍僅尺許鱗角差具養之湫中甚馴狎後叟死鄉人瘞之宅左此龍盤旋墓道狀若悲戚是夕風雨大作湧溪石爲叟成墳而去其石壘嵌甚固至今馬鬣若新

武寧縣志

卷四十四

雜記

一

八百六十三
四百四十五

按袁州府志盧肇記唐時有温媪者經程溪得巨卵藏於家生七龍放之江媪或至江口龍輒獻嘉魚媪死塋程溪水衝擊一夕雷雨遷之高岡鄉人因爲立祠額曰孝通廟事與伊叟相類伊叟墓石壘嵌甚固尤爲奇特

修水源出寧州西鄉黃龍山東南經州治又東經武寧縣治東北流數百里至海昏又東流百餘里入彭蠡湖郭璞記云有水名修有魚名儵天下有事此地無憂言可避亂也儵魚狀似青魚廣首長脣味極甘雋而脣尤美然至建昌炭婦河則絕無矣

縣東南八十里有山其峰高聳天矯如龍世傳漢末爲孫鍾種瓜之所瓜美有三仙造訪輒遺以瓜鍾母死未塋

三仙感其惠復來謂曰承公厚意今爲公母傳善地惟公採焉再世三世必大貴鍾唯唯回視三仙化爲白鶴飛去遂葬母於此後生子堅靈帝時爲長沙太守封烏程侯堅生策建安三年爲討逆將軍封吳侯策弟權稱吳王尋稱帝位傳六世因號此山曰吳王峰墓曰吳王墓

縣南三十步有腰帶水源出神童山爲縣脉西界水從西門入江明宏治間水衝決經臥象橋穿縣治入修江嘉靖間知縣唐牧障復故道尋決崇禎間知縣寇可教仍行障復

國初知縣任天祚改入縣治流至東水關入修江讖云水繞縣前流官清百姓柔

武寧縣志

卷四十四

雜記

二

四百六十二

宋時車翁者厚貲產無子以其貲委壻就養久之壻漸厭薄遂還家抵暮至其莊莊人訝之詢其由壻曰翁視聽未衰尙可圖後盍歸而納妾莊人徐姓有女及笄而未字向德翁卽於是夕以女侍焉時翁年七十後單生三胎孿生三胎翁嫗各得年九十餘構樓屋九區分住九子至今稱九樓車氏云

瀧溪荷墩有宦塚相傳徐尙書墓土人發壙得銀篋古鏡其鏡陰有湖州真石家念二叔照子十字字如栗大徑圍可茶盃許古意瑩瑩然不知何代物也篋織以銀絲絲細如髮工緻精密化之得四十八銖

伊山石湫中產龍鱗首有角鬣隆準豐脣悉如龍形每以秋分前後隨水湧出委積無算沿溪居民用簣畚羅取

有得數斛者鮮烹乾哺味皆甘美過此數夕卽不可得
遂相傳爲龍鱸云

武寧山壑深廣屢有蛟患每春夏蛟發輒冰雹大作溪水
湓湓冲决田土甚則漂沒廬舍人畜其害猝至莫可逃
避

黃山谷外集崇寧元年書蔡秀才屏風頌四首有曰武寧
縣中蔡老子能碁能酒又能詩胸中百萬多羅織不向
人間說是非又曰接人高下但唯唯又曰此翁家世印
纍纍當時不書秀才名字玩其語意蓋亦遺世棄俗之
流且其家多宦籍及稽武寧蔡氏譜宋代人物無一有
者卽秀才之名亦不得知古人湮沒無傳何可勝道其
頌辭頗屬率意今不備載

武寧縣志

卷四十四

雜記

三

八百八十五
四百五十三

龍潭清影四字舊志載黃山谷書鐫於石上今石壁存者
唯曲江謝存理篆有龍潭二字向東相傳山谷所書四
字臨潭向南沉水不可見有捕魚者識其字或水涸甚
時俯窺之隱隱有字跡云

坊市陳以經字元常建書屋於東南城外夏堰寺旁會文
者衆以城門啟閉有時雜選不一請開東濟門門高八
尺廣三尺今塞遺跡尙存

宋景定時余榮叔家巨富有幹才能辦國事遇寇警朝命
王珏出征軍需不給榮叔傾貲助事聞予以官不受上
益嘉之召見賜宴勞復寵以詩歸老昇仁鄉沒年八十
有奇在元至正己丑歲詳見元譜今其後裔吏員一棟
呈先朝舊牒洵堪徵信故錄之以示勸云

三聖廟都司線坦建其初分建於營署之左右祀關聖馬
王火神坦到任謁廟蹙然曰此非所以妥神靈也宜速
更之坦出人過廟欠伸起敬一日自建昌道中挽舟上
忽有聲如雷舵陷不得脫泅者沒者自下曳之則大木
浮出凡十二株堅好如新坦喜曰神賜也再拜稽首遂
運歸以建斯廟楹柱悉給焉廟在署外見祀秩

昇仁鄉冷廷珪十歲遭亂德祐乙亥元平章賽典赤得之
愛甚命次夫人金蓮養以爲子平章被謫籍沒珪力明
其非罪得全乃歸省生母至元壬辰率族黨重創義門
賽典赤爲請諸朝命學士李溥書冷氏義門旌之義門
蓋其先代所有也

元至正上南鄉芭蕉寺貢花木瓜入宮后秘愛枕之傷其
武寧縣志 卷四十四 雜記 四 四百十八

首上震怒詔廢其寺禍及諸宮觀見玉清碑記其地至
今日芭蕉故老猶傳其逸事云

元至正末石市熊姓聚族甚盛其鄰人某兄弟有膂力以
析薪自給一日大雪熊有富人置酒樓上集子弟吟賞
鄰人曳敗絮負薪過樓下熊見之憐其寒命僮召至與
之卮酒且笑曰若兄弟身長七八尺而不免饑寒是泥
牛耳鄰恚甚挾竿往見胡紹遠紹遠壯之署爲首領除
夕率數百人圍熊氏宅夜半舉火焚殺一空獨新婦葉
氏有五月孕時正歸寧產子伯雅遂依母家辟纊養子
後鄰人兄弟死於兵始歸而復其先業石市之熊皆伯
雅後也於戲一言之肆禍及宗親而伯雅母子卒以節
孝大其族天與善人豈不信哉

長墅原虎亂有孫日棟者曰吾聞人受虎殺則爲佞鬼每
導虎行虎擒人佞剥衣以待虎食遇有機陷引虎避之
佞何愚甚若虎噬我我必爲厲鬼以報越日其人竟爲
虎害妻啼於室曰某地有機子有靈當圖之是夕虎果
斃於機

熊埠灣李氏巖頭楊氏皆善格虎其敵虎之器戈矛外有
鐵涼傘每遇虎張口搏噬則以傘投入虎口反拽之傘
張不得脫挺刃而前若殺羊豕又有李五叔者尤能測
虎進退刃無虛發前後手斃十三虎又獨殺二虎倒曳
而歸其人形體短小又接物甚醇謹不類猛士云

石市民唐姓者抱養一媳年十一生一子十三又生一子
自後絕不復孕又龍石黎氏婦年五十六舉一子皆康

武寧縣志

卷四十四

雜記

五

四百六十五

熙初年事

南鄉葉生某赴省試行至靖安遇雨借宿一農家兄弟皆
客外姒娣二人守室其娣堅不允留姒重客文士又日
暮無投足處強止之令宿於堂且命其子從客授句讀
夜半雨益猛葉生臥一長几心煩不得寐起坐几上俯
視地忽裂一縫深黝中有光二炬大如盤火燄迸出生
大恐急呼其家走避不聽破壁而入挾其子登山母亦
隨出轉瞬雷電轟繞室已成澤明日有自下流來者言
其娣竟死於水云

邑舊有跳神之俗其爲神所憑依者曰馬脚亦曰降童民
家迎神童必從巫誦咒作法童則顛頓騰躍起作神語
決人疾病禍福鄉民多聽命焉凡神擇人而降衆召巫

作醮事合舊巫傳法於新降者鳴鉦擊鼓一村若狂謂之駕馬脚乾隆丙辰東門外有神降於人巫者侈其事衆益奔走相與設壇演法邑令吳使尉夜往偵之至則燭燎煌煌巫仗劍指揮降童方赤足踏火輒觀者如堵尉卽輓上鎖降童并逮巫就理自是跳神之風息矣上都余文行幼孤明末賦重力不支將避地以圖存臨行老僕有仁年七十餘匍匐下泣曰幼主有老母在義不可去余曰大尹徵求峻急鞭撲之慘女主人不能受也僕曰吾聞大尹雖峻於刑然立斃一命怒應少弛幼主人能留老僕不敢自愛其死衆皆壯之且疑之後值較期僕竟往尹大怒杖之百僕俯首受不發聲尹曰何物老賊敢強項乃爾僕曰非強也代幼主受杖出於至

武寧縣志

卷四十四

雜記

六

五百一十一

誠不敢以呼號之聲上瀆大人尹詰之僕且以告尹爲出涕曰此義僕也命之起厚卹之後尹雖盛怒見老僕卽霽顏所解救無不獲免文行家竟賴以全

王國珊明末富俠遭鄧雲龍亂夜縋城請大兵誅討卒爲雲龍所殺比葬家人具十二棺置疑塚於藿溪山相傳棺內藏金有閩人夜往發塚竟死其處珊碣頭人雲龍嘗脅以僞劄不受真義士也

明成化間邑人高希仁有贈宛平主簿石鏜詩云舊山松竹深開逕滿甕蒲萄暖泛春留得洛中風韻在我來何日接芳隣時高君亦在京師玩其詩詞襟懷亦自灑落而平生行實里居皆不可考矣鏜字大宇田坑人

巖陽山有石筍高十餘丈又有石柱高丈許大徑數尺其

上疊石十三條皆方長丈餘琢磨端好俗稱掇石云是善信尊者所疊然亦不知其何故也

梅岷夏銘明成化間入宮侍讀日親近上篤愛之銘性忠鯁不爲阿媚有古巷伯風歷事三朝恩寵備至及沒勅賜國葬其棺由巾口入小河不克進相傳水驟漲遂達墓所嘉靖勅文其姪指揮依禮奏疏石刻猶存墓上明季流賊利墓中所有甫啟石雷電交作乃止

縣署內祠王夫人靈爽甚著萬歷間一商載重貨行至三碛灘半猝遇暴風帆檣顛覆獨商舟獲濟其夕商夢二青鬟召至一所庭宇巍峻一冠帔貴人上坐命之曰以汝有陰德於人故得免此大阨當力爲善毋自暴棄商拜謝退旣出回視門上署額乃勅建王夫人祠六字

武寧縣志

卷四十四

雜記

七

五百〇字

昇仁鄉余登瀛工詩文由萬歷副榜轉天啟間貢自恨未登賢書賁志以歿歿後數月族人某暴死復甦云到一處村落人烟身所未歷中途遇登瀛握手慰勞如平生有頃鬢蹙曰此間非汝所宜至可速歸取旁徑送之且貽其姪庠生復亨訛云一榻松風下茫茫萬里山秋雲看世事榮落不相關族人業農不通韻語非能造作此訛者語畢復沒

安樂鄉松墅李元德生平不治產年五十操器出門開治要路境中紫鹿青牛兩處最險隘元德獨力平之三十年未嘗輟每攜寒具止宿巖中有虎當巖坐相忘也又嘗於峽要上開鑿峭石石發傷其足創甚風雨尤楚然治路不少休七十九時遇葛巾褐衣者於道曰明年元

且來已若創至期道人先在出葫蘆中一杯飲之創良已或以爲神賜云元德死其子愛青踵之有父風

坊市盛瀾澹爲人豪俠不治產揮灑如意善岐黃得針灸秘傳手至立效每出金製藥餌不計值人爭重之一時自丞尉以上皆與澹作布衣交獨於邑令王掄士厚且久未嘗干以私令益敬澹澹如故後令以帑虧被議卒於寧旅櫬寄蕭寺窘甚家屬累焉澹力爲經畫彌補如令在官日及歸復贈百金邑人咸高其義云

武寧向屬巨邑編鄉二十唐李巽奏分武寧西八鄉爲分寧南唐時復割縣南地以益靖安後併昇義入昇仁鄉此九鄉所由昉也分寧爲縣爲州沿革不一與武寧均隸南昌修水發源寧州沿流至武寧及建昌一水襟帶夾兩郡而滙左蠡雍正年間有以寧州轄武寧書上各憲邑廩生盛世麟監生張邈夫等力爭之懇吳令申詳事遂寢

紫姑仙乩仙也降筆言休咎至後始驗所爲詩詞皆奇雋可喜每盛宜仙禱之輒應宜仙死仙遂去乾隆壬午復降屏山盛氏有仙曰青湘子松風子及鶴亭閔道與學士談詩文酬唱甚盛後名仙頗多或懸筆作大字蒼古勁逸迥出塵表求者隨時直書多名言格句足備箴銘又教人行善事及修煉養靈之法然必得庠生黃雲嶠至始降亦大異也

長樂鄉余汝錢字定谷性淳篤有孝行童時失怙痛哭不食者數日母患頭疾三年醫藥罔效錢至誠愷惻奔走

數百里禱靈神獲愈後病復作垂危舉家惶惶失措錢焚香禱哭割股肉和藥糜進母遂霍然而起曰方夢見閻君謂我數盡念汝子苦孝當延一紀逾年果如所夢亦足以見匹夫愚誠感應不爽云

西關有四望龍潭諸勝蹟登臨者徃徃流連不舍乾隆癸未後自大小西門至南門平砂細石隱隱一線越數年如練又數年大石小石磊砢沙際遂成新洲縱橫約千畝環抱縣治河水繞南岍如帶人以爲地脉之靈云

按盛孝廉牧南渡新洲原唱地勢滄桑變天然一小洲沙痕纔映雪水氣尙涵秋賈客喧中渡河源繞外流垂綸思徃事閒坐待漁舟此一徵也因附錄之

入都石言出身行伍白頭兵寇武寧城言奮力當先斬獲

武寧縣志

卷四十四

雜記

九

五百五字

甚衆都統朱奇其勇委令開路所至有功嗣撫軍董克復銅鼓言隨營錄力報功授本營把總見秩官志

鐘鼎山有丹曰在黃婆洞最深僻處長二尺許廣尺可搗藥又玉清宮旁有丹井圈跡世傳玉清丹畦卽此舊志僞撰呂巖詩問我身從何處去蓬萊頂上會神仙大可噴飯宮中道士鑄之石壁盛于埜戲題石壁云我來汲取仙泉水濺盡千年石上羞

舊志豫寧八景最無稽曰甘羅故居新志作唐宋時甘羅二姓者近是次之三硤怪石事涉荒唐抑有何佳致而列於八景耶且諸詩皆鄙俚識者嗤之新志概芟易以山水雜詠較爲大方然八景之說自京師至府州縣徃徃見諸吟咏何也若以鄭郊草堂配柳渾精舍風流

宛在他如玉枕清風鶴橋明月鍾陵瓜圃伊洞龍鯁至
今相沿不替而意興所之尋芳步勝則又有南浦漁歌
東林牧笛足爲風雩浴沂者助也復軒盛學鬯云

太平山嘗宿重雲好事者于雲深處置缶貯盈以帑封固
挈之下山出酒席間刺其孔雲裊窈而上縈蕩竟日不
散又山高寒積雪至五六尺彌月不能行康熙間有道
人至宮中赤足趺坐閉目不食數日忽失所在蓋遊仙
也

破石日休堂不知建自何人何代鄉里釀金構義塾卜地
於石湖之南得古碑橫額有日休堂三大字其下小字
多漫滅可識惟詩書種子才之難若此八年長至樸村
十五字而已舉義者同村盧全萬王孔煒孟權孟元文

武寧縣志

卷四十四

雜記

十

四百六十六

乾梅良珙六人云

盛西園名林讀書能文屢應童子試不售以過勞得痰疾
嘗於舟中作詩云同人鼾睡一燈孤月上篷牕獨照吾
灘水秋來知已淺病愁深結繫蓬蘆竟以痰疾卒示凡
云當年遺恨一杯孤雲水蒼茫孰故吾秋柳春花常過
眼祇愁依樣畫葫蘆後其孫時珍質敏異早年入學亦
不永其年邑人惜焉

南鄉石門山石罅中有桃樹一株僅數尺枝條蟠結如蓋
花實甚繁相傳自然真人章權孫手植土人取實種蒔
百顆不得一苗亦異事也

樹德堂坊市張機宅明益王筆跡書法古勁至今巋然宗
裔庠生廷懋及弟廷楷居焉懋伯仲友愛怡怡一堂擁

書自娛塵囂不染嘗顧謂諸子曰吾家典型尙在也爾曹勉旃又嘗構異方治人痰核多奇驗製藥施濟一無所取遠近德之楷子鳳英會勲俱弱冠補弟子員

昇仁鄉聶公旭女幼許字同鄉葉宴林有某與其父有隙以不白事汚其女致葉人棄婚女含屈不能自明幾死泣告其父曰事旣如此若適他人是受汚無已時也誓當終身侍膝下旭故遺產給之有餘輒分與兄弟及修橋路茶亭不使有餘年八十無遺議鄉人知其冤咸嘆服焉其後誣者乏嗣

香雪亭在縣尉署西董永錫建邑令鄒應元題舊有古梅一株大可數尺圍亭亭如蓋冬春間梅花盛放飲酒賦詩其下雅韻幽香徐徐入座間尉族董作棟少負才名

武寧縣志

卷四十四

雜記

七

四百九十二

自浙來署與邑中知名士吟哦亭上流連不去作棟號幹夫戊戌成進士

柳山陰有月嶺修衍而平明末張秀才穀嘗於此疊石成陣以禦寇穀遇異人授陰符秘書考象驗事洞鑒不爽徃徃假黃冠出遊方外後人因名嶺曰疊陣嶺

新豐寺有銅佛高丈餘廣六尺佛陰字刻載一萬八千斤明成化六年萬宗澮熊伏瓚諸人助鑄

南鄉羅穆美鬚髯工詩授徒夏庄作九子吟愷切悲惋嗚咽欲絕遂得病翌日筍輿昇歸病月餘復起乘輿徃夏庄與九子暢談古學大白三浮曰吾不復來矣遂歸是夕竟卒卒時口占新句云學不到神仙何處容吾武甲申流寇充斥大隊屯魯溪舉村逃匿穴洞其資橐薄者

散伏林莽間游騎四掠殘暴不堪路經拖兜洞劉姓丁壯悉力攻之發檀砲殲十餘騎寇奔駭哨聚一時蜂起雲集凡穴處者莫不避鋒深入賊愈忿拆屋材縛衣絮聚糠粟穴口委積如邱環以風車鼓烟焰以薰灼之凡山有十餘穴穴所容多者二三百人少亦百十餘人莫有生者時劉氏八十人潛瑤門洞洞門窄徑二三尺許計以水綿塞之可禦而賊攻之且速劉璇甫及門輒冒烟而死延兩日夜火燼賊解劉璣以外巡得免尋至洞門得其兄璇尸復入越大石門丈許燭之惟大士座燈殘若螢欲滅不滅急張以火見祖母在大士座前父抱其左母抱其右環膝壯幼十餘輩昏迷如睡莫能語急予以湯方甦遍閱其餘爪秃髮結額破血流者得湯亦

武寧縣志

卷四十四

雜記

三

四百九十五

生徐問以故云穴烟大入氣鬱逆觸土著崖彼此衝擊不能已唯大士座前勢小殺不覺其慘云
流寇之亂有渠魁者以殺人爲戲日驅童子分跪道左每殺一童取刀插其前渠躍舞良久拔刀取首首落大笑以次相及無有生者最後一童度必死不如轉弑伺渠舞時急拔所插刀砍渠足斷而仆遂疾趨得免諸寇見之皆拍掌聚笑云

巾村李氏枕碧山上有七人墓相傳順治元年同鄉人擊自成餘黨不克死之因纍瘞於此山三面枕池松櫟陰森至今猶英風凜凜云

江陰鄉鳳口鹿頂廟側有古樟二株高十餘丈圍廣丈餘枝柯俯仰交映有雌雄狀客有將二百金圖此樹者夜

夢神人謂曰予安此地久矣汝何故見害明晨客攜匠
往忽雷雨交作鋸斧不能施及霽得殘石鏤有公母樹
三字遂止至今爲潘氏公蓄

登高山李斐字浴弦後街張達源字放泉均邑諸生年相
若少同師事學博盛鍾靈爲文清新奇特一洗卑靡習
氣邑前輩余比部盛明經咸許可之斐性耿介不喜豪
華鄉里子弟有拂意者面叱不忌源稍純和而賦性冷
落戛戛獨造然皆困於場屋抑鬱數十年喜酒相遇輒
飲飲輒醉稱莫逆交杜工部所謂酒中仙殆其人也

王夫人祠在縣署內東偏正德間奉勅建者時華林賊猖
獗官軍莫能制知縣毛丕功夢夫人授以方略明日臨
陣又見夫人冠帔行空中羽扇指揮賊遂大敗旣奏凱

武寧縣志

卷四十四

雜記

十三

八百九十五
四百九十三

以其事聞遂予廟祀數百年來屢徵靈異順治甲午春
祠下產芝三本秋闈中式者三人

邑人姓婁者康熙初年賈廣西欲至舖家索負五更起出
門天尙黑忽見前路白光如日謂天已曙矣前行見一
亭過亭復有一橋度橋入黑洞中不復辨去向但覺腥
穢特甚水如潮湧將身滾出於外昏迷不省俄而天曉
漸甦見大蛇尾如山迴旋而去身尙偃臥不能動行人
見之詢知其故昇歸主家身已腐爛歲餘方平復滿身
蛻殼膚如蛇皮矣錢塘徐子靜爲奉新羅坊巡檢在南
昌見其人自言如此

江陰鄉父子操舟者泊舟河灣天雨雪將暮有麗人倚舟
泣曰妾爲姑逐無所歸對岸有母家幸假舟渡以全妾

命操舟者憐而渡之泊岍雪益盛促之去麗人又泣曰
母家山下距此三四里寒夜一婦人難行乞舟頭坐一
夕舟父不可麗人哀惋嫵媚有餘妍其子心動姑止之
夜與其子歡狎黎明竟踏雪去已而見雪上有女跡微
露蹄影其子循迹逶迤行數里至山上遇竇跡滅審視
則一狐熟斝竇中遂擊斃之

七峰張秀才居山性闢佛老遇土木像輒毀之西北鄉喜
淫祀聞張秀才至則匿像於室往往搜而毀之又性迂
嚴每妻子有過則臥床不食數日必待妻子跪床前悔
罪乃食嘗曰刑于寡妻大難也然好遊山制小車可陟
降不顛仆遇好風日則乘之遊至暮不倦云

瞿梁石路陡峻下臨仙人潭有岨高數丈橫亘畝許向鑿
武寧縣志 卷四十四 雜記 西 四百七十三
小磴通往來每遇陰雨積雪行者自岨返邑人李啟喬
費數百緡修治凡八閱月剷削未及三之一忽晝晦諸
工登高鑿險聞空中人語曰走走俄而雷雨交作潭水
沸騰工倉忙趨避而懸岨崩裂遂成坦道人以為有神
助云

下南鄉萬孝廉廷彩以湖廣布政司副使致仕既歸召故
人子弟終日會飲嘗以二疏自况著呆齋詩文皆散亡
不可得及年九十賓客盈庭洗爵以獻願先生賦詩自
壽彩口占六言曰官至參政非小年登九十非天田園
我買我賣世事勿曉勿曉其精神強健胸懷開拓類如
此

花棚柯性剛少孤以采苓為生供母後遇異人傳得外科

秘方所用刀藥皆奇驗性至孝爲母祈年食長齋人號曰柯齋公及母患癱症剛親侍膝下任求醫者皆不出度其可返而後去有富人以重金要致百里外剛辭親友勸之行剛曰吾舍母吾早以技致富矣卒不往汪指揮不知何許人其年代亦不可考康熙間順義鄉人附葬穿穴得竇視之則見土室高廣方丈磚石四周中有石几列盤盞作供狀其盤盞皆古瓷器也

康熙戊辰南鄉陽坊田中崩出元至元間墓碑額篆陳孺人王氏壙銘七字其文有慮夫滄桑遷變仁人君子見而掩之所深望焉謹爲之銘志諸幽之語里人遂爲封識

康熙戊辰四月十七日烈風大作山口張氏受禍最慘宮

武寧縣志

卷四十四

雜記

五

四百七十五

室悉飄舉空中四圍牆垣飛擲如亂蓬參天大樹掣向大江去一村死者凡三十人壯者膚剝骨脫或兩臂抱頭而死幼者吹入雲間墜若瓦解其殘息尙存者十一人皆脫落附折昏迷不省真山鄉亘古未有之奇變也邑秀才蕭露瀼有烈風吟以紀其事

上都余宙明性至孝力農灌園以備色養其父老病閉結不能如園明手爲疏導燥糞者十餘年

昇仁鄉汪惟玉時年踰五十無子然好善益篤里有石橋自鳴三日而傾汪欲重修囊中又無多金因求助於人以襄不逮時某某許之汪喜曰橋可成矣後碑紀名爭主修某竟分文不出汪售物產給工去越歲汪竟舉二子蓋亦爲善之報云

宋進士楊友龍有手卷畫三百餘人皆同榜進士每人胸間註其地里姓名冠服井然康熙中嫡裔持以質穀有覽其圖者云楊進士貌豐潤微鬚年可三十餘以見宋時士氣之盛留傳數百年其意象尙可憶念也

鄭山人蓮池或曰西郊四望山下或曰縣東看鶴橋側今呼荷花塘是也黃魯直過草堂詩曰開徑老禪來煮茗老禪謂延恩師法安又曰還尋密竹逕中歸則知草堂於寺不甚遠也延恩寺舊志載在尊賢坊蓮池似應屬縣西古人遺跡難考如此

武安山多勇健最著者曰彭鵠能腋兩笠飛離縣十五里頃刻往返山上皆稱爲鷓曰劉野豬黑面長牙首可觸千斤曰李拘騾力雄嘗乘騾策之不捷遂以杖荷騾而

武寧縣志

卷四十四

雜記

十六

五百正字

行若舉羽然曰盧虎咤叱如虎聲震山谷聞者股栗皆一時之豪盡殲於麻潭陣唯聶潮玉得免焉

康熙庚寅邑多虎患城東有貧家子兄弟二人往樵甫入山兄爲虎所得坐之臀下其弟年僅十二見兄呼號且哭且詈追至虎側奮力一砍正中其鼻虎斃而兄竟獲全咸以爲精誠所感有神助云

康熙丙申邑大水有徽商者吳姓遺其名載鹽五百餘泊武寧巾口繫船大樹下水益漲兩岍居民呼號乞命吳商聞之趣舟子往救舟人以裝重有難色商卽取鹽投水中甫解纜其樹輒仆舟子感動併力度人全活甚衆太學生王崑秀年四十餘無子夢一老人詔之曰馬鞍岡上有三子盍往拾之旣覺卽往其地聞茅舍中哭聲甚

哀詢之賣妻以償所負夫婦不忍別且泣且愬生心動
亟止之代償宿負且厚卹其家而去明年正月生婦舉
一子十二月又舉一子側室亦生一子一歲得三子竟
符所夢

潘士學少時讀書別墅與狐仙竹青遇久之益相親暱家
人怪其狀詢之學具以實告家人曰妖也當治之明日
竹青至謂士學曰家人謀治我耶今當別重會在江城
學詢後事曰兩廣仙旣去學怏怏失望計無所之遂遊
江城會金聲桓畔大兵圍城食盡主者將害之學心動
祝曰竹青救我須臾狂風大作仙攜學往墮軍營主帥
見而愛之視學如子攜之北上後以原姓名中順天鄉
試仕終湖廣廣濟知縣果如仙言其子姓遂歸旗焉學

武寧縣志

卷四十四

雜記

七

四百六十六

爲潘儻後儻以進士官知州祀鄉賢祠

丙申大水寧州一女子坐床上汨楊柳灣手提囊金呼漁
舟求救漁人給合擲囊竟推其床泊浪去後得金構屋
立焚且顛沛死

雍正己酉七月中吳王峰頭雷電旋繞大雨如注空中見
火光激射莫測所以明日山下見一獸巨口方額體被
綠毛長丈許火氣氤氳不敢近蓋狽與龍鬪不勝墜死
土人坎而瘞之

北山岬僧爾建病洪鶴齋往視之僧曰命盡今日卽治香
水澡浴趺坐四圍積薪命舉火合掌誦經而逝遂建塔
塔上有光達旦數月人以爲舍利云

雍正庚戌春石口熊氏厄痘疫村內半月殤三十三人競

傳痘神爲祟怪異多端舉村驚怖士人熊墨園作討痘神檄其略云正直聰明曰神天地好生而乃戕滅生人是邪昧物也不已吾將沈而於河其無悔時墨園一子方歲餘覽者皆搖首吐舌妻泣涕諫止不聽亟取檄向空中焚之其後疫遂寢同里痘童皆安好而墨園之子竟未傳痘

雙嶠山溪水南流遶縣東門又西折永慶寺前與修水合溪東南曰孟家灣地勢窪下或山水驟漲往往橫流入灣民謠云水走孟家灣黎民逃上山蓋本形家水破巽方之說往者縣尹令鄉民插楊楹以爲捍蔽歲久樹枯其地漸爲民侵墾乾隆三年衆聲其事於邑令吳始清出公地周植楓杞復蔚然成林矣

武寧縣志

卷四十四

雜記

六

四百六十三

丞廳內署有香木瓜一株高數丈霜皮斑駁枝幹奇古花似海棠而香甚清越結實雖繁然易飄墜秋飈起則枝頭濯濯矣每遇解試之期邑人以果實去留占入數多寡亦復奇驗

乾隆戊午大風雨雹大田鄔家有物吹落屋上雨霽取之則牙笏也鄉人駭怖競傳爲龍王笏請巫禳祝投諸修水

乾隆庚寅六月初二大雨平地水深丈餘漂沒昇仁鄉明經周某及門人八鄉人數十委隣縣臨視賑恤有差昇仁鄉有獵者夜夢一老人曰而能可相我及覺獵者怪之明午天晴耀獵者入山忽大雷雨避古樹下雷環繞其樹雨如注獵者驚怖雷益烈微窺樹中隱隱有物雷

自上怒擊其中若有黑氣如霧上騰雷逡巡而退獵者
祝曰必欲我相雨微殺乃可展力少頃雨漸細雷方奮
擊獵者自樹縫中發藥黑氣不得上雷盡力一擊乃斃
天大霽視之則一巨蜈蚣也

明經黃夢鶴之子名某讀書有膂力夜半已睡聞門外有
聲啟門則虎已入半某當門力拒之室中妻子悸怖股
栗乃疾呼曰起起時某左肩壓門右翼妻子登樓力將
乏虎遂入室與虎相搏自室至堂家人益震駭某曰毋
出吾可獨當搏之益力虎躍牆頭墮復鬪酣戰一夕虎
疲由短牆遁去鄉人稱爲黃食虎云

嚴陽山有猴攜子巢大樹上母中獵夫藥垂危顧子下淚
抱乳久之又掇樹葉裹餘乳以飲子低徊不忍舍忽墮

武寧縣志

卷四十四

雜記

十九

四百六十一

地而死獵者心動遂終身不復獵

仙人潭有巨蜈蚣吐涎如長虹掛石壁上是年遂有大水
其水之大小視涎之高下如則而止康熙丙申乾隆丙
寅涎最高云

藍田朱謙嘗過九宮山遇驟雨臨溪見一僧招之曰急渡
謙從之甫登岍水大至及踵疾趨得免其僧不見謙子
方七歲是夕夢有僧脫父難覺白於母及謙還詢之果
如所夢

坊市汪之東一名乾山長於詩畫歷參南昌南康二郡椽
兩太守皆愛其筆墨稱曰今之摩詰流也年四十卒
昇仁鄉聶允元以諸生入大學善琴每於山樓月夜彈之
音韻幽絕聞者以爲鶴唳近年屋後掘得一石床古質

蒼潤相傳爲允元故物蓋已二百餘年矣今藏太學林材順家

黃茅尖在縣西數里山頂有廟祀盧仙姑廟前有古柏千餘年物也相傳仙姑手植雍正末一夕枯落殆盡至乾隆乙未忽發新葉嫩枝柔條葱蒨如故

周中峯墓碑爲人掘置池口陰覆其字一日婦人坐碑上浣衣歸病且危有神降於庭曰而辱周進士罪不宥家人惶恐稽首請罪不知所爲已而降神者忽奔池上肩碑疾馳插於山上乃見其字中有貢禮部周中峯墓七太字上闕數字旁有少中大夫江南諸道御史臺治書侍御史王家綸題二十字

乾隆丙寅大水寧州漂樓屋過縣南門時方漏初樓上燈

武寧縣志

卷四十四

雜記

三

四百四十一

燭煌煌呼號乞救兒女啼泣聲不絕迅濤飛射不知所終

某鄉有婦不順於姑姑白於子子頗護之婦益詬厲子不能禁姑老且瞽婦以殘食餉之旣死婦猶讒姑短一日雷電繞室梓夫婦跪堂上良久子甦忽挈婦於姑塚旁擊死

國朝水災莫甚於康熙丙申其次則乾隆丙寅兩水之發皆在五月朔日相距三十年時刻不爽

朝廷軫念民瘼例得報災兩次皆蒙發賑井里安堵不至流亡亦藉賢守令之力爲多云

昇仙觀夜半鐘鼓自鳴聲振林麓睡者驚不敢臥少頃雷電風雨交作屋瓦丁丁然如有物負之以徙者天明雨

止道士啟門則兩旁皆成溪矣時乾隆戊辰七月二十八夜

東鄉黎國寶常過僻谷孤舍見一僧坐堂上酣飲又室中隱隱有婦人泣聲旣行且暮黎語同行曰僧必有故盍往視之同行有難色黎乃獨返至則婦人赤縛榻上僧將據腹取孕矣黎叱之僧遁去婦乃得全

塘盤李名某將鬻豕屠者持金估直約明晨屠豕去李置金枕下以事他出次日屠者至李妻往厨治湯屠者乘間入室攫金屠豕飄然竟去比李歸索金不見以語諷婦婦恚甚遂縊而死李大悔恨入城謀棺衾時日景正中天無纖雲忽霹靂一聲屠者震死跪於街側手持原金衆競取之力奪不解李至探手得金一時稱快

武寧縣志

卷四十四

雜記

三

四百七十六

乾隆戊寅五月南鄉山中久雨水漲夜旣半驟入某棚合室驚潰婦急不得衣走棚後坡上立水衝坡將崩鄰人有立隔溝上坡者呼之走婦慙不應鄰人曰急難之際尙何嫌疑亟踰溝走可逃命也引手援之婦堅拒曰吾不顧命矣言未畢而坡崩遂溺死邑人盧金鏡作夜大水樂府哀之

瀧溪今桑溪瀧音雙水之源曰瀧桑溪劉氏崩出劉宣義古碑有其先自德安遷武寧瀧溪本邑黃陂免解進士女婿余炳龍書訪之余譜竟無其人世之湮沒不傳及傳而訛者大率類此炳龍字漕元

宋武帝時武寧楊歡妻姪女從股中生至齊猶在見路史以下新增高坪古樹長約十丈許大四十圍枝幹繁茂無花實歲二

易葉或至於三初葉圓如珪繼而上圓下銳其色碧三則奇出作鹿角狀其色紅雖博識者不能名爲何物也宋黃山谷贈邱十四郎墨跡相傳雍正間分寧陳步廬得自都門後爲鄉人劉墨莊購去旋歸邑程盟山家因爲刻石粵西石儀亭宰武見搨本索觀手稿愛而欲留之弗獲旣調任玉山復遣伴賫書以請程氏子式故與石善舉而畀之惟石刻今尙存

嘉慶戊辰九月十三日午雷擊太平宮前銀杏遂焚越三晝夜而熄灰燼中有骨約數石觀者麋至舐之粘舌乃羣拾去

鳳溪由公母樟樹二株循溪而上二里許曰港下有連理樟樹二株樹隔深澗澗東者大二十餘圍一根自上橫

武寧縣志

卷四十四

雜記

三

四百七十一

亘跨澗石橋倚焉一根自水底斜度與澗西連高大相埒叢柯交互如翠蓋數百年物也

張鈺貴溪人道陵五十九世孫嘉慶丙子冬奉檄抵武寧過窮溪俯江樓道經曲池七姑橋橋下水深丈餘初有魚長數尺圍圍然泊岸見者捕之魚或遠或近誘至深處捕者幾瀕於危遇行人救之半晌方蘓鈺書符投之魚怪遂絕

鳳溪石陂堰灌田三千餘畝其堰湍廣可數畝每遇旱涸照下蔭上法輪流車堰日間車淺夜半輒漲每車至四五日有二大魚出游必滂沱大沛屢驗

吳祐字漢卿號節山坊市人以歲貢任江蘓嘉定縣主簿蒞官三載解組歸琴書之外別無長物士論高之姪吳

宗周由選貢任南直應天府教授宗儒爲名下士馮志稱其博通古今士林翹楚宗周與邑孝廉方繼懋友善爲諸生時讀書鹿洞洞田半爲土人占隱相與清出田數十頃見鹿洞志前明隆慶間邑令胡東陽聘祐主修縣志兩公協理悉心蒐羅規模大備而祐伯姪弟兄人品學問一堂濟美時稱爲三吳云

盧琳字天谷號耘吾長樂鄉大田人少負奇氣喜文章摹秘閣諸書旣由武科宦南漕訖遂歸扁戶讀書十餘年所爲詩文益工其於書法乃大得意年雖老猶手此不疲事二親待昆弟皆善遇後輩霽顏相對舉古人成敗得失爲勸戒聞者多所感激著有耘吾詩草一夜軒文集

武寧縣志

卷四十四

雜記

三

九百五
四百七十一

陳奇文順義鄉地平人生平以濟人爲心康熙丙申歲三月雨彌日水驟漲泊河廬舍飄折殆盡先是奇文結茅棚數椽於高阜造竹筏治火具人求其故曰爲此以防水之不虞也族里咸笑其迂一夕水暴至奇文以有備而免併得接其未濟者于是活人甚眾

程永川年豐鄉南坪人性孝友兄緣事戍黔永川從之往徒步三千餘里蒙犯霜露足指皆裂至數月歸告兄平安於母以慰其心已復往省數次有女兄嫁於龔夫死子喪四孫皆幼而厚於貲永川爲之經紀出入絲毫不苟貲遂日拓居十有三年龔孫長告歸龔具二百金爲壽永川曰吾爲爾祖孫寡弱而來豈圖厚報耶麾之不
受

盛兆基坊市人博覽羣書通曉大義父病痺數載服侍不離左右父歿奉母尤篤無何疾作自知不起命妻子曰吾不能侍老母餘年罪莫大焉死必以斬衰加我身否則目不瞑矣妻子如其言於同懷兄弟八人皆怡怡然有無相濟胞姪翹自諸生選拔貢入成均每試必優與資斧族隣貧乏者亦周卹不吝年未及中壽而歿人咸惜之

呂字號適菴臨江清江人幼隨人張藥肆於武寧遇張閏榻指授書義篝燈夜讀遂能詩古文詞著賈餘集若干卷付梓邑令潮州許勉齋羅田陳韻石得其文皆擊節歎賞湘潭尹吉生來令耳其名夜巡過肆聞琴聲歎關而入相得甚歡久之以祖母某太夫人節孝傳見屬呂武寧縣志

卷四十四

雜記

三

四百九十字

均無所干謁念少長於武學成於武徵集前輩詩歌閉戶評選數月成帙將付剞劂以有窒礙不果年六十七歿於肆

盛遇楨字樹芳江陰鄉人生性樸訥足跡不履城市躬耕養親能盡子職母歿繼母氏石後其父數十年卒楨侍奉不懈弟遇楠早喪子女皆幼教育嫁娶如已出家無厚產每歲施穀若干石於養濟院命後裔垂爲定額

柳山寺本悅仙院向棲羽流今爲釋子所居前有石門鐫七絕四章不書作者姓字詩云初日暉暉照翠苔庭前昨夜碧桃開一簾香霧微風動知是仙人跨鶴來深院棋聲日正長博山添火爇沉香道人鞭起竜行雨帶得東潭水氣涼天院涼風似水流山中瑤草不知秋黃庭

讀罷無餘事鉄笛一聲閒倚樓養就還丹不怕寒獨騎
黃鶴上雲端笑談若得天家雪散作琪花滿石欄世傳
爲山谷詩按宋嘉定時紫清真人葛長庚嘗登是山爲
李太亞作湧翠亭記今玩是詩筆意似與記相類殆爲
長庚所作歟惜無紫清詩文全集可証也

田李氏字阿芸貢生李蓋孫女幼歸田家貧侍姑病刲臂
以進事聞知縣尹作翰賜紀孝詩一時和響者衆刻有
紀孝詩鈔又余賢震妻盧氏精蘊女幼歸余道光元年
五月亦有刲臂救姑事與李氏同皆可紀也尹詩見藝
文

桐林汪逢錦妻申氏輝彩女道光十年姑病篤申割股救
之遂痊廩貢王佐偕族隣請 令給誠孝動人額

武寧縣志

卷四十四

雜記

三

四百六

南皋潘張氏職員躍龍媳姑邢病亟張割股肉和羹進遽
愈族隣爲之請 令給孝行真誠額

下南陳延棫妻嚴氏姑病侍湯藥不得効嚴割股進乃効
隣族爲之請 令給孝心誠篤額

盛明錫故農家子秉性純篤事父母以孝聞道光元年父
喪哀毀廬墓三年比繼母張病危延醫不效錫割股和
湯藥進遂愈旣越二年張病彌篤錫又割股病尋復愈
鄰感其誠孝動天沈疴若失爲鳴諸官咸嘖嘖稱道

石鼓范賦煜少孤家貧傭耕事母能色養道光九年母病
數月衣不解帶親侍湯藥病劇煜割左股食母少愈復
割其右以進然母病終不起旣居喪累日痛哭不食隣
扶勸之始獲見創詢知巔末族諸生鳳翔作歌紀其事

邑令給額獎之道光十六年其祖上濱病篤煜割股肉醫之如前

上南鄉坪原周必義之子榮良母張氏於嘉慶二十五年抱病卧床數月醫藥罔效榮良驀藏暗室割股和粥以進張病遂愈張後享年九十一歲榮良亦得年八十餘瓜源燈盞塢有石盃大如盆水清盈四時不涸遇大旱土人禱雨甚驗毋亦有龍則靈之謂歟

王叔怡龍鬚人嘗入深谷遙聞鼓樂之音訇然振林木稍逼見數道士列几具供饌若禮壇者叔怡叱之皆逸去惟餘酒杯三枚後以此杯注酒祀神甫注一杯雲霧頓起堂中數人不辨面目此杯至今存焉叔怡倜儻有俠氣尤善丹青筆墨所留人皆寶貴

武寧縣志

卷四十四

雜記

三

四百八十六

北鄉湖灘湯子洪與太平山章真人友善一日真人訪公散步大壠裏真人曰此地有甘泉掘之可給數百戶之需隨束茅爲記後子洪於茅下掘丈許果得清泉冬溫夏涼味極甘美天將雨嘗有五色雙尾小魚浮遊水面後裔輝南奇之甃石修理至今利賴焉

李美斯年豐二十八都上墩人資稟穎異樂就文士相講習敦手足誼弟煥佩羅重疾焚香靜夜割左股肉以進事屬創聞而友于之愛可謂篤矣

胡廷厚江陰鄉長沙人家故貧以耕養親平生絕葷酒人問之曰願二老長壽耳每冬夜先以身煖父被父寢於母亦如之歷十餘年無或間娶室黃亦能曲體夫意親歿夫婦哀號失聲既葬廷厚攜草蓆宿墓旁者各數月

草野愚氓至性如此其殆得天獨厚者後數年無子廷厚歿人爲之嗚悵

盧元璧坊市人家赤貧貨履爲生身雖未學而天性極厚母氏甘老病拘攣起居飲食皆需人元璧竭力孝養每曉起煮茗扶母坐飲旣衣櫛侍溲穢及盥沃躬炊爨手箸進餐畢乃自食然有酒肉必奉母而躬茹藜藿晏如也飯已告出負草屨粥於市及日中歸午飯如晨飯已復出泊暮必歸篝燈織屨周旋牀第溫清事先意承志服勞弗衰自是無冬無夏靡夕靡朝者歷十有八年如一日當時賢貴咸敬禮之間巷月旦津津曰今必於市井中求孝子若貨履之盧元璧其庶乎逮母氏歿終喪元璧始獲娶妻生子無何子天身故其家爲立祧嗣又

武寧縣志

卷四十四

雜記

七

九百九十八

天天之所以報施善人何如也噫

初瓜源洞口巉巖峯嶺下臨深溪以纜引橋相續度之曰弔橋至今遺跡尙在乾隆五十八年龍溪寺僧雲濤募化得金開鑿層崖沿溪修磴盤紆里許卒售已產益之工始告竣善信樂捐姓名鐫碑四座標西域佛國篆文於碑首邑廩生舒以長有記見藝文

碧田河橋高二丈有奇行人失足落水無或傷者聞生員王翰余凌霄監生余廷瑞等議修之日適有老翁科頭垢面向索筆硯書良辰黏壁上衆姑允之尋質之諸形家莫敢異議累石爲基水涸兩月咸擬之洛陽神課云道光十四年夏旱相傳觀風山最高峯有大白蛇每遇雲起出而吸去匝月後大雷電繞其峯七晝夜草木俱燼

尋其骨與穴不見蛇亦至今不出

道光己亥庚子間邑多虎患下南冲有柯際智者夜持木
梃引數猛犬逐獸至馬脊坂見一大獸在田犬直前爭
噬際智奮梃連擊而斃負之歸去毛煮食舉家數十人
皆飽越三日藥商至其家見餘爪曰何時獲虎骨何在
曰吾以爲田豕嗜肉無餘骨盡在犬腹矣此較誤食虻
蟻者尤可笑

嘉慶中馬脊山居民柯勝儀於雨後出獵山半遇大雉立
石上屏息窺其後每一鳴則一聲雷動一朵雲起頗以
爲異遂發火鎗殺之烹一晝夜肉硬不可食

十二都甘泉觀門外有晉朝柏樹兩株相傳明時邑令某
命伐爲竅木道人泣訴於神忽疾雷一聲皆自末至本

武寧縣志

卷四十四

雜記

三

四百八十字

中分爲二令駭而止至今葱翠鬱然

十三都北山下柯際志妻劉氏家世貧乏志傭於族人而
多病氏屢求日者推命皆云夫婦命不俱存氏隱憂于
中日承歡姑氏不改其常道光乙巳正月廿日姑卒志
病如故氏待至三月廿日登樓自縊志果病愈事與府
志甘大憲妻龔氏相類紀之皆賢其愚也

昇仁鄉柯瀾劉才招少孤貧體羸不能力作母余氏老而
痿足招襁負於背至人村前位母籬落間叩門乞食有
所得必先以進母而後自食其餘二十年無倦容迨母
益憊乃寢之於牀乞米數合卽歸具盤殮獻上日數往
返已不療饑如是又四年母九十有二歲卒典居室營
墓營齋哀毀骨立未幾亦卒

長墅源里民余興昭嘗與星子縣某同行某病革告以所
往并屬銀千餘兩尋歿昭請地方守其屍而自攜銀代
交不獲所受還枕某屍裹銀于身守數晝夜地方鳴於
官昭以銀獻久之某家人至歸銀毫無苟且乃白其事
得脫而未嘗以語人也前正誼山長查振旗爲星子人
具狀以聞知縣陳雲章遍訪得之獎勵再三贈匹夫慕
義額

葉萬軒號情田廉村人性慈厚其族戚某無以爲昏代變
所有以權子母至昏日盡出畀之丐民有病者市藥以
療其妻盧氏親爲之前年五十病革語盧曰我死券中
錢穀若干其貧難償者焚之盧從其言今其孫飛鵬庠
生立生監生人以爲積善之報云

武寧縣志

卷四十四

雜記

三

四百七十九

魏子元字汗崖南鄉磊石人父早世事母氏張色養無違
母沒廬墓三年兄弟孤貧撫養成立且修理敗塚倡建
橋路甚夥夫婦皆上壽而卒次子兆芬監生

錦雞石在四十都相傳有錦雞時見道光二十八年夏四
月某日晨雷雨交作有一聲唱曉之勢雨後視之石上
留指爪痕深寸許

葛挹風字晞明羅溪人性平易無疾言倨色胸中涇渭炯
然讀書淡於科名舉鄉賓不就蒔花養魚翛然意遠善
書求者輒錄先賢格言以應課讀之餘與耕夫言孝弟
親切有味父老皆尊之爲師云

葉穎函號夔齋廉村人幼穎異初授學頗通經義八歲祖
母喪哀慟動人事親奉養無少怠讀書不求聞達嘗肆

力於諸子百家下筆爲文輒汪洋浩瀚尤深於易河洛
理數之說多所發明著有文集詩鈔待梓季子先鼎庠
生

三港口滙諸溪水遇有雨則澎湃奔騰逾時始退霞港葉
美文弱冠時甫半濟被漂去里許恍惚有神擁之登岸
人以爲先世有隱德也

切下職員葉啟字懿谷號錦峯積學未售性樸傲喜施與
嘗置棺木百具以恤窮死者又修本境路費二百金里
人以負其貲故欲鬻妻以償啟止之焚其券年八十四
而卒子余芳監生孫顯翰庠生

張亨鍊安樂鄉曲池人幼孤一兄早卒貧不能娶母劉氏
目盲早衰艱於起居每日扶負端坐自出外覓食歸以

武寧縣志

卷四十四

雜記

三

九百十二
四百六十八

進之雖盛暑嚴寒必保不餒夜伴之寢凡溲溺抑搔悉
細心體察老患哮喘疾力難任勞究於左右無廢事性戇
直不善輒語至母前則下氣柔聲依依孺慕數十年如
一日母年九十二卒擗踊哀號者歲餘葬後遇風雨必
泣護墓所時已六十二歲後六年亦卒過其里者咸爲
惋悼

道光己丑安樂鄉廣福寺僧某嘗於秋夜偕一牧童驅害
苗之獸時雲深月暗忽有一獸抵前舉棒擊之獸大吼
一聲捧折牧童驚仆於地僧進以短棒擊相持半晌獸
竟斃尋欲與牧童負之去重甚始歸邀衆僧至其所天
已明矣有老僧識之曰此豹也於是觀者如堵莫解其
得之由後聞徙建邑桃峯寺亦嘗獨斃一虎云

江豚產彭蠡大江不入修水道光某年月日見於縣東渡口旬日不去時浮水面城鄉男婦往觀日以百計漁人聚小艇數十截流圍之不獲次年五月十三日二十五都某獲於社埠重八十觔以獻縣令給金賞之

癸未年五月分寧發蛟有與年豐鄉界某氏女字下流某氏子請期備奩資有日矣水漂女宅女抱一箱浮水面順流見一人持長竿取水物女號救其人取箱棄女女得不死及于歸之日女入壻房則箱在焉詢諸姑告之曰而夫上年大水時所獲也女恚甚誓不與爲昏而去又某年北鄉磧溪山蛟水暴發農人某耕港畔水驟至登大榿樹避之蛟過樹塌隨蛟順流抵建昌見蛟在柴薪屑水中蜿蜒作勢時隱時見其人皇慙伏樹不知所爲尋泊岸得免

武寧縣志

卷四十四

雜記

三

九百十三
五百正字

南鄉坪原旌陽廟右側地名黃家巷有大石四枚其形象鐘鼓棋牌又三溪石橋下有銅鐘一面鐵劍一枝兩岸古樹數株環抱左右

柯愈達字先柏學者所稱惺廬先生是也居羊腸之巔采薺穫粟皆誦九經文心有所會則輟工微笑年逾三十人無知之者同時劉蔓說名噪一郡睥睨士林絕少許可偶於普安精舍見其詩文驚爲奇男子寄書數百言訂交復親至山舍賞其論說浹辰結姻而還由是從學者日集每講經史繪古人立言之神一堂無歧念蔓說偕之就試再蹶不出耕如故有族子某招肆一廛竟歲獲二百緡又惡達之分也謀獨有之達遂不取一錢飄

然去人問焉笑而若忘居恒多喜色嘗有楚名士柯勝
典汪越疑其所學乃藍縷矚諸室見方食半菽點頷愉
愉適瑞昌汪生入問方卯之聞曰誠有之破當無黃二
名士不禁粲然達徐檢成丁百鳥志與之閱始慙謝
熊松山名棄夫南鄉凹坵人讀書能文字解八法教人執
筆結構井然訓童子口講指畫疏濬性靈無學究迂腐
氣年屆七十囑其子曰某月日時吾死及期無疾怡然
卧戚友兄弟妻子俱侍乃娓娓道其生平并道其名棄
夫之故遽問子曰夜如何未應嗒然思瞿然起曰此其
時也大笑而終

年豐鄉車隆達柏樹下人女英秀十八歲歸徐正書逮二
十四歲父病危急女在側聞割股可救遂入僻室刳左

武寧縣志

卷四十四

雜記

三

九百十四
四百九十八

股肉和湯以進病立起獲痊有問之者女曰身體髮膚
豈敢毀傷顧對此一息奄奄計無可出姑盡心力爲之
耳其愚孝如此得之女流蓋亦難教諭 范贈有車孝
女歌一篇見藝文

生員張必遂字用周坊市人少力學爲邑名諸生性篤孝
父喪未葬時康熙丙申邑大水水及厝室猝不及遷隣
里邀走避城北高阜處公偕陳孺人守死不去旋謀以
二鉅瓮束棺夫婦哭伏其上少頃水大至高逾簷室壞
棺浮以載鉅瓮故雖浮弗覆號救不絕聲望者以筏救
得免水罷旣葬廬墓三年繼母王老病日公左右養悉
如其父豫寧學租不給公欲捐租以贍未果後人成之
猶公意也厥後孫曾元輩成三進士居官清正輝映後

先積善餘慶報施洵不爽云

戴冠元字文冰號帶圍南鄉瓶源人早歲失恃事繼母以孝聞天資遲鈍勵志於學窮年手不釋卷家貧乏處之晏如也某年嘉平之晦有索負者踵門聞冠元披書坐誦聲甚鉅而噍以殺疑以爲哀號也駭而去食餼後及貢期先一月而卒著有帶圍文稿待梓

李承育字浣瀾號宜圃國學生北鄉建富人祖又自由邑廩生舉鄉飲介賓承育復膺舉如其祖爲人質直敦本常改厝先塋見白蟻浸棺泣曰汝食吾先骸骨吾且食汝人慮其毒沮之承育嚼咽數十無恙前令尹公作翰榜邑中有品士方瀚費鍊華潘音呂等十二人爲邑儀望承育次焉蓋嘉其有不由至之風也著左傳淺說待

武寧縣志

卷四十四

雜記

三

九百十五
四百九十二

梓太史李儒郊爲之序孝廉查星渚先生爲正誼書院山長見而跋之卒時年九十有六

葉達爲字以書號脩圃邑廩生昇仁箬田人性穎異四歲識字七歲能文事母孝母年逾九十達爲亦七十餘仍作萊子舞衣之狀以取母歡笑家屢空乏不令母知曰無使老年人生憂也素行廉介學問淹博學者多稱之子鴻舉邑庠生

程銓號蒞房年豐南程人舉茂才樂善愍愍曾徒步三十里訪九樓孝子車必秋錄其事爲文郵書雲南巡撫譚尙忠獎諭風世具見申酉十七篇學使沈愛其才欲招入幕以親老辭篤孝友父兄怒則蕭衣冠色霽乃退友盧某旅死招其子至自楚贈貲舁歸閩時論尙之

董敬書號慎菴北鄉甫田人家貧嗜學嘗自塾歸口誦而足迷徑客外獲異味必攜以遺親戊辰鄉試將入闈聞母病星夜馳歸兩日夜抵家母卒哀毀骨立昏迷不省人事者累月兄弟五人怡怡一室清明掃墓適聞兄逝至顛撲不能行生平與黃菊里友善菊里病視湯藥者月餘死後爲之經營石塚且立嗣以祧之及門貧士不計俸且贍膏火賴以成者多某年有愚孝劉姓者母沒思慕成癡疾病不能醫爲之延醫館中數月而愈其天性純篤類此子冀新邑庠生

葉蘊字宣露一字遠山歲貢生年豐斜石人與兄廩生葉蘭弟歲貢生葉藻優增生葉蕙姪增生葉鳳翔一堂師友更迭唱酬遠山尤灑落豪放不羈每啣杯於瑞芳園

武寧縣志

卷四十四

雜記

三

五百〇三字

拈韻弄毫相與酌江山之秀甫得一紙門下生輒取去已而散失詩文而外凡晉接者導迎善類書味盎然蓋莫不佩其世德云

傅翌商字湘琴一字賚軒廷試進士年豐石坑人形癯如鶴坦然無城府文尙高華授徒稱善誘鄉文社極力經紀獎成後進邑太僕盧容菴深契之延課孫曹以遠大相期許在都三年歸與弟優增生傅美商講學篤行益自下爲善益不足蓋其學日進而心愈虛如此

葉有聲字響珮號駿齋南鄉下垵人歲貢生秉性椎魯能自刻苦成其性詣文章不苟爲時尚教諭項典軒評其文爲一邑望肄業豫章友教兩書院方伯陳笠颿重其品學賚書幣聘爲西賓辭不就在鄉教授二十餘年從

遊者多所就進焉

北鄉東坪黃沙溝陳思貴妻劉氏年六十餘死葬十四日矣無何叔死術者以嫂葬所有煞犯令改瘞之至聞有聲自墓出啟之果蘇後踰五十三日死陳故貧家棺皆縫裂無灰裹以草又築之不堅故得蘇蘇時饑則齧草以食事在道光己亥年又大嶺下一李少婦既棺其母來哭聞棺中呼母聲急出之後年至八十嘻尸未冰而渴殯者可戒也

彭尚興明嘉靖北鄉二十七都硤境人道光乙巳年里人治玉清宮於隱處得一舊楹聯板字跡未湮欸識硤境信官彭尚興獻後查彭氏墳果一官也相傳明時有彭太監居彭家墩現有羅漢松樹二三丈高其花園中故

武寧縣志

卷四十四

雜記

三

四百八十三

物也墩距硤境蓋僅數武云

年豐鄉車湧瑞柏樹下人行介而心慈新建李某家分寧湮於水存十歲孩憐之如已出爲積銀三百餘送歸嘉慶十七年大饑平糴復代貧轉質廣治蔬田以繼不足僱工互販虧錢百餘緡湖北災民病不起者六人甦以米藥給資回里醫固其素業云

戴守文昇仁鄉人居鄰富川家小裕樂善而不競於名其子授州同職顯光邑庠生占魁孫候選衛千總鴻翽候選縣丞咸章皆慷慨好義克承先志如顯光修武興界道路橋梁費二千餘緡偕謝炳然建小賓興館費一千餘緡曾未對人一言若無是事者然

劉思禹字紹明號敬山昇仁上洋湖人生平勇於赴義食

力省垣見武邑漕倉在貓竹架下江水激蕩次船多傾覆之患乃於康熙初年捐貲改建惠民門外之套內不惟漕船安穩卽各舟維泊亦永避風濤然其時爭者興訟思禹雖理直得伸而竟以是焚身邑人士感其義祀主倉中每歲共出米若干石酬其嗣裔曰跳板米

附詳請武邑照寧州例院府連場考試原案

乾隆八年童生徐士鐸等以應試程途遠阻籲恩院府連場等情具呈前縣鄭 詳請 前府憲吳照寧州例於 學憲按臨之先造冊送試以省諸童一番跋涉等因奉 批如詳行繳嗣於乾隆十年據童生盛於虬等稟請勒碑以垂久遠奉前縣嚴在昌批院府連場考試係奉 前府憲暨府憲體恤單寒之意既蒙恩准於前自無更改於後據稟勒石垂久聽爾自便可也該童盛于虬等未及勒碑乾隆十七年童生盧大炳等以學憲歲試未周恐府憲檄行催考復以前情并抄叙各案具呈前縣鄒業經據情詳請循行舊例等因奉前府憲張批如詳飭遵繳已上自乾隆八年起至十七年止各

武寧縣志

卷四十四

雜記

三七

五百十八

屆考試俱循行舊例院府連場在案乾隆十九年前府憲朱 檄催考試復經童生盧大炳等具呈前縣鄒詳請仍循舊例一體栽培等因奉 批查該縣童生歷來挨至學憲開考尙未府試臨期促迫諸務潦草如此大典豈容姑息市恩致滋慢悞今番因恐仍沿舊習輒爲請寬久經備牌行縣何竟並不寓目一任經胥混詳殊屬不合現在最遠如寧州亦已遵照未便延緩仰卽將文武童趕緊試竣令卽促裝來省候期無違此檄等因各該童遵照於六月赴府考試至臘月院試往返半年貲斧不給乾隆二十二年童生吳沅等復以因地制宜等情呈縣本縣宋 據情轉詳竊照文武諸童縣試已竣自應遵照 憲檄示期造冊批送聽候考試緣卑縣

僻處山陬距省寫遠更兼溪河一線水淺灘高往返動需時日是以乾隆八年及乾隆十七年前令鄭大敬鄒應元任內經各儒童等呈請院府連場考試詳蒙 前府憲節次批允在案嗣於乾隆十九年前令又復具文請示奉 前府憲朱批飭恐臨期迫促諸務潦草駁飭照舊批送候考亦在案茲據卑縣童生吳沅等連名籲請復詳前來卑縣復查考試爲士子進身之階豈容憚往返之勞姑息遷就諸童之中或住居鄉僻或遠館隔屬兩番解館赴省不特貲斧艱難更恐有妨教讀貧寒之士每慮失館致生畏阻之心倘蒙 憲恩垂念單寒仍循舊例於 院試將次按臨之時飭令諸童同赴憲轅連場考試則諸童仰沐栽培比戶頂祝 憲德矣

武寧縣志

卷四十四

雜記

三六

九百一十五
五百二十一

卑職未敢擅便理合據情詳請 憲臺酌奪批示飭遵等因奉 府憲積 批如詳行繳復據生員張國學等具呈 學憲勒石成規奉 學憲張批飭查議到府行縣該本縣宋 查雅化造士首錄單寒路遠貲艱墮其進取殊非茅茹彙征之意雖臨期接考稍與先期考錄之例未符而鼓舞羣倫原在因地制宜若非詳明立案則或駁或准旣無一定章程卽每次詳明亦不無數繁案牘應如該生等所請轉詳飭遵但 院府連考府屬有卑縣及寧州不便兩歧似應卑職會同寧州酌議核定距 學憲按臨若干日期畫一齊集赴 憲轅考試逾期均不收錄再事關考試

大典攸關應請通詳 各憲刊入縣志庶可永遠遵循至

刻碑立石禁革民間事宜期於觸目警心而設今衡文
考校仰蒙 各憲栽培俾寒士均沾樂育俯允連場有
案可稽足垂久遠且恐藉立碑名色致啟科歛之端該
生等所請勒石成規之處毋庸議緣奉飭議是否允協
理合粘連奉發原詞詳候 憲臺核示遵行等因復移
寧州會詳奉 府憲積 批查寧州生員何易謙等並
該縣生員張國學等先後赴 學憲衙門具呈均奉批
飭照所請辦理遵照在案則是府考儒童自可不必再
行通詳但連場考校若不預定日期致恐臨時周章嗣
後俟 學憲取齊文檄到府本府行知該縣卽行傳齊
赴考不得再爲延挨致有遲悞可也等因 梁志

附邑人呈請勒石永禁差役乘轎下鄉私帶白役碑誌

武寧縣志 卷四十四 雜記 三十九 五百一七

武寧縣正堂王 抄奉 南昌府正堂楊 爲謝恩懇

恩事案據武寧縣民陳安谷等具控緣民武邑僻處山
隅每逢訟案及縣各公事等屢遭差役乘轎下鄉私帶
白役擾累民難堪命迭經稟縣並不查究以故弊竇日
熾慣成積習迨舊五月民等備情泣稟蒙 前憲蔡痛
念民艱准出示禁奉批另錄嗣因卸篆批示未示 邵
陞憲榮任民復接叩沐出示禁遍貼鄉城蠹等始知畏
法萬民咸頌生佛弊絕風清民安樂土但蠹狡猾異常
禁不垂久弊必復生若僅出示貼禁而不勒石永杜在
目前雖可保無害誠恐相傳未久紙朽字朦不無故轍
仍蹈之累茲幸 大憲福星駕臨德政交頌此種擾累
斷不肯稍存寬宥必不忍留害將來爲此具呈叩請捨

准勒石飭縣監碑嚴禁恩垂不朽蠹害永杜合邑戴德
萬代沾恩上告等情據此除詞批示外合行檄飭爲此
票仰該縣立即遵照迅將前發告示勒石示禁仍將碑
摹印刷一紙具文送 府查核毋稍縱延干咎速速須
票等因到縣奉此除嚴行查究外合行勒石爲此示諭
各里民知悉自後如有差役仍蹈前轍許卽指名稟究
該各差役等務宜遵例守法如遇詞訟案件并征催錢
糧毋許乘輜下鄉私帶白役故違擾累一經訪聞或被
告發定卽嚴行究辦決不姑寬該里民等亦不得藉端
滋事凜遵毋違特示 南昌府正堂邵 爲嚴行示禁
事案據武寧縣民陳安谷等具控差役乘輜下鄉及私
帶白役久奉飭禁何以該縣胥役尙敢故違擾累除飭
縣嚴行查究外合行示禁爲此示仰該縣軍民人等知
悉嗣後縣差再敢乘輜下鄉私帶白役擾累許卽扭稟
該縣解府嚴究鄉保人等如敢通同徇隱查出一併重
究不貸各宜凜遵毋違特示 嘉慶四年六月監立署
前

附公蓄樹木

南關外離城二里許土名南市嶺西邊樟樹二株一株圍六尺長七丈一株圍七尺六寸長八丈耆民曾本然獻北鄉二十六都祥麥陵離城十五里株樹五株松樹一株爲行人所憩息康熙年間里民李克秀手植

沙田橋側大章樹一株垂蔭數畝民人鍾啟雲開佐輝光林應嘉其中曾克從嘉球等連地契買獻公長蓄永庇行人

附各鄉捐輸修志姓名 乾隆壬寅

安樂鄉

張耀南 石韵圃 王茂元 王鏡溪

日休堂 以上捐銀拾兩

昇仁鄉

劉臨萬 拾伍兩 張維藩 拾貳兩 劉光廷 拾貳兩

黎秀坡 拾貳兩 陳金章 夏理藪 聶步蕃 黎碧畦

劉雲從 以上捐銀拾兩

年豐鄉

生員李瑤 肆拾兩 程王儒 拾伍兩 李亭玻 劉廷占

朱璧英 以上捐銀拾兩

上南鄉

武寧縣志

卷四十四

附捐輸姓名

九百五十一 三百字

鄒盛猷 肆拾兩 周得華 貳拾兩 劉美瑞 貳拾兩 楊昌哲 拾肆兩

丁明達 張玉鏞 張兼善 熊恒茂

姜希選 張婉如 陰剛生 朱頤中

張旭旦 鄒文宇 胡君祿 羅南峰

葉旦成 葉得中 吳如公 葉耀祖

葉從雲 葉汪度 葉任如 葛天儀

陳國仲 羅杏林 張丙文 葉煥章

張文賢 劉大業 以上捐銀拾兩

下南鄉

吏員李彩希 周敬公 陳為質 鍾蒂拔

邱直山 趙達隆 以上捐銀拾兩

江陰鄉

蔡精通

胡富六

胡式谷 以上捐銀拾兩

長樂鄉

監生舒承志

貳兩拾貳兩

董子夫

拾壹兩

港下盧眾

拾貳兩

李俊賢

盧永言

孫世顯

貢生盧呈藻

監生舒兆起 以上捐銀拾兩

順義鄉

陳次璜

拾陸兩

鄭日瑋

余偉芳

以上捐銀貳兩

熊太寧

熊鳳昭

熊選賢

仰裕文

段元善

胡海

胡商璧

葉鳳集

葉孔達

葉萬邦

周克緒

周奉莪

鄭文穆

黎經遠

蕭次吳

徐珍廷

黃應清

陳又新

以上捐銀拾兩

楊谷用

捐銀叁拾柒兩

朱裕鼎

捐銀叁拾兩

雷肖江

胡周言

王孟昇

以上捐銀拾兩

武寧縣志

卷四十四

附捐輸姓名

二

九百九十七

後序

邑進士 張富經 亞滄

吾邑志迭有興廢其廢也有係乎天數者有係乎人事者馮韻卿屈明初兵燹後倣照永樂間繕本志欠精詳無怪其然也嘉靖時唐君世惠萬曆時胡君東陽林君文升述舊作新三志俱無咎無譽惟宗禎七年寇公以吾邑名宦苦心補葺人以爲必有佳本矣乃旋以內擢去與厥後乾隆二十年宋侯編輯未就卽內升而去同此廢之關乎天數者也康熙五年馮志文成草創猶足以爲攷信之書後此乾隆十五年劉志任屬不一卒無定本金匱鄒公來涖是鄉息心搜討繁稱博引最爲詳備觀其極詆前志遺漏舛謬草率成書居然自命不凡矣奈格於物議而書不行此廢之關乎人事在乾隆十九年者也越後二十八年梁公鳴岡因縣志之闕如沮郡

武寧縣志

後序

一

五百四十二

修之考據廣延宿學編次成書梁總大綱焉於是武甯之士宜風俗粲如列眉矣陳秋河以道光四年懷復古之思珥纂修之筆集思廣益綱舉目張其書不旣明備乎茲道光戊申大憲議修省志檄飭各郡縣預修以供採擇明府李琴山先生集諸紳士議之時有封翁張渾齋先生與哲嗣星曹慨然獨任其費越翌日鄉紳士畢集翕然樂從余以爲天數難知而人事可恃已如此凡我同人和衷共濟於以適觀厥成不難矣且夫武小邑耳未嘗有經天緯地之文然而聲教所訖涵濡已久士之彬彬然能文章者猶足繼往開來至於今不絕曩者古學如張閏榻先生奧折得之史漢研鍊得之公穀其次三盛二余盧容菴王七宣諸前輩亦馳驟文壇今人之勤學猶是山水之鍾靈猶是必當繼前光而植品端方吐屬

風雅以副邑父母暨各大憲光華文治之至意余老矣竊啓
寡聞無能爲役惟是夙夜之自矢者不徇情不漁利不阿黨
不苛刻與諸君子皆有同心所幸間叅末議以贊成其書議
論存直道之公去取協輿情之正人事既盡斯天數自不得
而違安在今日之志不克續前志而徵明備也哉是爲序

重修縣志書後

邑古爰侯地也於南郡為奧壤代為人物文章道光戊申李侯琴山先生自南中來蒞茲土是歲春檄有事於志書越九月告成志自鄒明府纂後山川之奧衍如故雲光顧其書乃中於他議後二十年而梁轄之梁後又四

武寧縣志

後跋

十年陳總之方陳纂次之二年先君子解組旋里得與一二校學之勞書成先君子跋之載在簡末今又二十有六年矣空閒替興沿革義烈節士勲爵文章高隱方外雜技與夫機祥怪變幻奧不可窮詰之故不賴賢司牧網羅而記編之抑亦一時之闕典也造問邑人士膺侯

校書之命公慎自矢侯亦虚心採納俾學不盡
有極不可否事皆侯節以出不浸浮議嗚呼
重生事矣其費自經始至終事悉斗是給
蓋先君子遺命也門分三十二卷分四十四
文凡廿多八千八百片奇斗因之片所感矣
昔司馬氏紬史記垂篋石室之書蓋不忘前

武寧縣志

後跋

二

人所稱論著以平生業定盡闕幽潛之去然後
作哉夫志稱史然方侯下其事先君子前斗
明然曰前志予以卸篆歸遲未能悉似生平所
願高推者今老矣汝曹生無言之乎獨斗謗陋
無能仰承先志中池疾甚夫後何言惟念諸
君子風雨鷄鳴以成此書既幸是有以仰副

賢侯分編之至意而為古爰添一章於陳侯
之後俾一時之節義人文精英庶藉以少露于
遐蓋亦每十年而一有因措手以跋於後竊恐
斗父子名後先掛在邑書之末為餘以業之惜
乎志成而先君子不及見也道光己酉季春月
下泮邑優增生諒叙通判張向斗星曹氏并書

武寧縣志

後跋

三

